

四庫全書

史部

欽定四庫全書

繹史卷八十七下

靈壁縣知縣馬驢撰

晉卿廢興下

新序趙文子問於叔向曰晉六將軍孰先亡乎對曰其中行氏乎文子曰何故先亡對曰中行氏之為政也以苛為察以欺為明以刻為忠以計多為善以聚斂為良譬之猶鞞革者也大則大矣裂之道也當先亡

左傳

襄公

二十四年春穆叔如晉范宣子逆之問焉曰古

人有言曰死而不朽何謂也穆叔未對宣子曰昔句之祖自虞以上為陶唐氏在夏為御龍氏在商為豕韋氏在周為唐杜氏晉主夏盟為范氏其是之謂乎穆叔曰以豹所聞此之謂世祿非不朽也魯有先大夫曰臧文仲既沒其言立其是之謂乎豹聞之大上有立德其次有立功其次有立言雖久不廢此之謂不朽若夫保姓受氏以守宗祊世不絕祀無國無之祿之大者不可謂不朽

不朽

國語魯襄公使叔孫穆子來聘范宣子問焉曰人有言曰死而不朽何謂也穆子未對宣子曰昔句

之祖自虞以上為陶唐氏在夏為御龍氏在商為豕韋氏在周為唐杜氏周卑晉繼之為范氏其此之謂乎對曰以豹之所聞此之謂世祿非不朽也魯先大夫臧文仲其身沒矣其言立於後世此之謂死而不朽

國語范宣子與蘇大夫爭田久而無成宣子欲攻之問於伯華伯華曰外有軍內有事赤也外事也不敢僂官且吾子之心有出焉可徵訊也問於孫林父孫林父曰旅人所以事子也唯事是待問於張老張老曰老也以軍事承子非戎則非吾所知也問於祁奚祁奚曰公族之不恭公室之有回內事之邪大夫之貪是吾臯也若

以軍官從子之私懼子之應且憎也問於籍偃籍偃曰
偃以斧鉞從於張孟曰聽命焉若夫子之命也何二之
有釋夫子而舉是反吾子也問於叔魚叔魚曰待吾為
子戮之叔向聞之見宣子曰聞子與蘇未寧徧問於大
夫又無決盜訪之訾柘訾柘實直而博直能端辯之博
能上下比之且吾子之家老也吾聞國家有大事必順
於典刑而訪咨於耆老而後行之司馬侯見曰聞吾子
有蘇之怒吾以為不信諸侯皆有二心是之不憂而怒

蘇大夫非子之任也祁午見曰晉為諸侯盟主子為正
卿若能靖端諸侯使服朝命於晉晉國其誰不為子從
何必蘇盍密蘇蘇大以平小乎宣子問於訾拓訾拓對
曰昔隰叔子違周難於晉國生子輿為理以正於朝朝
無姦官為司空以正於國國無敗績世及武子佐文襄
為諸侯諸侯無二心及為卿以輔成景軍無敗政及為
成師居大傅端刑法輯訓典國無姦民後之人可則是
以受隨范及文子成晉荆之盟豐兄弟之國使無有閒

隙是以受郇櫟今吾子嗣位於朝無姦行於國無邪民
於是無四方之患而無外內之憂賴三子之功而饗其
祿位今既無事矣而非蘇於是加寵將何治為宣子說
乃益蘇田而與之蘇訾柘死范宣子謂獻子曰鞅乎昔
者吾有訾柘也吾朝夕顧焉以相晉國且為吾家今吾
觀女也專則不能謀則無與將若之何對曰鞅也居處
恭不敢安易敬學而好仁蘇於政而好其道謀於衆不
以賈好私志雖衷不敢謂是也必長者之由宣子曰可

以免身 范獻子聘於魯問具山敖山魯人以其鄉對
獻子曰不為具敖乎對曰先君獻武之諱也獻子歸徧
告其所知曰人不可以不學吾適魯而名其二諱為笑
焉唯不學也人之有學也猶木之有枝葉也木有枝葉
猶庇蔭人而况君子之學乎 董叔將取於范氏叔向
曰范氏富盍已乎曰欲為繫援焉它日董祁愬於范獻
子曰不吾敬也獻子執而紡於庭之槐叔向過之曰子
盍為我請乎叔向曰求繫既繫矣求援既援矣欲而得

之又何請焉

列女傳范獻子之三子遊於趙氏趙簡子乘馬園中園中多株問三子曰奈何長者曰明君不問不為亂君不問而為中者曰愛馬足則無愛民力愛民力則無愛馬足少者曰可以三德使民設令伐株於山將有馬為也已而閑囿示之株夫山遠而囿近是民說一矣去險阻之山而伐平林之株民說二矣既畢而賤賣民說三矣簡子從之民果大說少子伐其謀歸以告母母喟然歎

曰終滅范氏者必是子也夫伐功恃勞鮮能布仁乘偽

行詐莫能久長其後智伯滅范氏

古文瑣語范獻子卜獵命占之其繇曰君

子得龜小人遺冠范獻子獵而無得遺其豹冠

列子范氏有子曰子華善養私名舉國服之有寵於晉君不仕而居三卿之右目所偏視晉國爵之口所偏肥晉國黜之遊其庭者侔於朝子華使其俠客以智鄙相攻強弱相凌雖傷破於前不用介意終日夜以此為戲樂國殆成俗禾生子伯范氏之上客出行經坳外宿於

田更商丘開之舍中夜未生子伯二人相與言子華之名勢能使存者亡亡者存富者貧貧者富商丘開先窘於饑寒潛於牖北聽之因假糧荷畚之子華之門子華之門徒皆世族也縞衣乘軒緩步闊視顧見商丘開年老力弱面目黧黑衣冠不檢莫不眦之既而狎侮欺詒攬挹挨枕亡所不為商丘開常無愠容而諸客之技單憊於戲笑遂與商丘開俱乘高臺於衆中漫言曰有能自投下者賞百金衆皆競應商丘開以為信然遂先投

下形若飛鳥揚於地，飢骨無碣。范氏之黨以為偶然，未
詎怪也。因復指河曲之淫隈曰：彼中有寶珠，泳可得也。
商邱開復從而泳之，既出果得珠焉。衆昉同疑，子華昉
令豫肉食衣帛之次，俄而范氏之藏大火。子華曰：若能
入火取錦者，從所得多少賞。若商邱開往無難，色入火
往還埃不漫，身不焦。范氏之黨以為有道，乃共謝之曰：
吾不知子之有道而誕子，吾不知子之神人而辱子。子
其愚我也，子其聾我也，子其盲我也。敢問其道。商邱開

曰吾亡道雖吾之心亦不知所以雖然有一於此試與
子言之曩子二客之宿吾舍也聞譽范氏之勢能使存
者亡亡者存富者貧貧者富吾誠之無二心故不遠而
來及來以子黨之言皆實也唯恐誠之之不至行之之
不及不知形體之所措利害之所存也心一而已物亡
迯者如斯而已今昉知子黨之誕我我內藏猜慮外矜
觀聽追幸昔日之不焦溺也怛然內熱怵然震悸矣水
火豈復可近哉自此之後范氏門徒路遇乞兒馬醫弗

敢辱也必下車而揖之宰我聞之以告仲尼仲尼曰汝
弗知乎夫至信之人可以感物也動天地感鬼神橫六
合而無逆者豈但履危險入水火而已哉商丘開信偽
物猶不逆況彼我皆誠哉小子識之

○其文竒幻雖寓言非實亦以見范

氏熱手薰灼之勢矣 世本范氏晉大夫隰叔生士蒍
蒍生成伯缺缺生武子會會生文叔變變生宣叔句句
生獻子鞅鞅生吉射 晉大夫逝遊生桓伯林父林父
生宣伯庚庚生獻伯偃偃生穆伯吳吳生寅本姓荀自
荀偃將中軍晉改中軍曰中行因氏馬元與智氏同祖
逝遊○按左傳僖公二十八年晉侯作三行以禦狄荀
林父將中行此命氏之由中行非中軍所改
也世本說非是杜氏云三行無佐疑大夫帥

左傳

昭公二十九年

冬晉趙鞅荀寅帥師城汝濱遂賦晉國一

鼓鐵以鑄刑鼎著范宣子所為刑書焉仲尼曰晉其亡乎失其度矣夫晉國將守唐叔之所受法度以經緯其民卿大夫以序守之民是以能尊其貴貴是以能守其業貴賤不愆所謂度也文公是以作執秩之官為被廬之法以為盟主今棄是度也而為刑鼎民在鼎矣何以尊貴貴何業之守貴賤無序何以為國且夫宣子之刑夷之蒐也晉國之亂制也若之何以為法蔡史墨曰范

氏中行氏其亡乎中行寅為下卿而干上令擅作刑器以為國法是法姦也又加范氏焉易之亡也其及趙氏

趙孟與焉然不得已若德可以免

史記趙簡子疾五日不知人大夫皆懼醫

扁鵲視之出董安于問扁鵲曰血脉治也而何怪在昔秦繆公嘗如此七日而寤寤之日告公孫支與子輿曰我之帝所甚樂吾所以久者適有學也帝告我晉國將大亂五世不安其後將霸未老而死霸者之子且令而國男女無別公孫支書而藏之秦識於是出矣獻公之亂文公之霸而襄公敗秦師于穀而歸縱淫此子之所聞今主君之疾與之同不出三日疾必閒閒必有言也居二日半簡子寤語大夫曰我之帝所甚樂與百神游於鈞天廣樂九奏萬舞不類三代之樂其聲動人心有一熊欲來援我帝命我射之中熊熊死又有一羆來我

又射之中。黹死。帝甚喜。賜我二筍。皆有副。吾見兒在帝側。帝屬我一翟犬。曰：「及而子之壯也。」以賜之。帝告我。晉國且世衰。七世而亡。嬴姓將大敗周人於范。魁之西。而亦不能。有也。今余思虞舜之勲。適余將以其胄。女孟姚配。而七世之孫董安于受言。而書藏之。以扁鵲言告簡子。簡子賜扁鵲田四萬畝。他日簡子出。有人當道辟之。不去。從者怒。將刃之。當道者曰：「吾欲有謁於主君。從者以聞。簡子召之。曰：『譖吾有所見。子晰也。』當道者曰：『屏左右。願有謁。』簡子屏人。當道者曰：『主君之疾。臣在帝側。簡子曰：『然有之。』子之見我。我何為。當道者曰：『帝令主君射熊與羆。皆死。簡子曰：『是且何也。』當道者曰：『晉國且有難。主君首之。帝令主君滅二卿。夫熊與羆皆其祖也。簡子曰：『帝賜我二筍。皆有副。何也。』當道者曰：『主君之子將克二國。於翟皆子姓也。簡子曰：『吾見兒在帝側。帝屬我一翟犬。曰：『及而子之長。以賜之。夫兒何謂。以賜翟犬。當道者曰：『兒主君之子也。翟犬者代之先也。主君之子

且必有代及主君之後嗣且有革政而胡服并二國於
翟簡子問其姓而延之以官當道者曰臣野人致帝命
耳遂不見簡子書藏之府○史定公十
三年晉趙鞅謂邯鄲
鄲午曰歸我衛貢五百家吾舍諸晉陽午許諾歸告其

父兄父兄皆曰不可衛是以為邯鄲而寘諸晉陽絕衛
之道也不如侵齊而謀之乃如之而歸之於晉陽趙孟
怒召午而囚諸晉陽使其從者說劍而入涉賓不可乃
使告邯鄲人曰吾私有討於午也二子唯所欲立遂
殺午趙稷涉賓以邯鄲叛夏六月上軍司馬籍秦圍邯

鄆邯鄆午荀寅之甥也荀寅范吉射之姻也而相與睦故不與圍邯鄆將作亂董安于聞之告趙孟曰先備諸趙孟曰晉國有命始禍者死為後可也安于曰與其害於民寧我獨死請以我說趙孟不可秋七月范氏中行氏伐趙氏之宮趙鞅奔晉陽晉人圍之范臯夷無寵於范吉射而欲為亂於范氏梁嬰父嬖於知文子文子欲以為卿韓簡子與中行文子相惡魏襄子亦與范昭子相惡故五子謀將逐荀寅而以梁嬰父代之逐范吉射

而以范臯夷代之荀躒言于晉侯曰君命大臣始禍者
死載書在河今三臣始禍而獨逐鞅刑已不鈞矣請皆
逐之冬十一月荀躒韓不信魏曼多奉公以伐范氏中
行氏弗克二子將伐公齊高彊曰三折肱知為良醫唯
伐君為不可民弗與也我以伐君在此矣三家未睦可
盡克也克之君將誰與若先伐君是使睦也弗聽遂伐
公國人助公二子敗從而伐之丁未荀寅士吉射奔朝
歌韓魏以趙氏為請十二月辛未趙鞅入於絳盟于公

宮

公羊傳此叛也其言歸何以地正國也其以地正國奈何晉趙鞅取晉陽之甲以逐荀寅與士吉射荀寅

與士吉射者曷為者也君側之惡人也此逐君側之惡人曷為以叛言之無君命也殺梁傳以者不以者也

叛直叛也此叛也其以歸言之何也貴其以地反也貴其以地反則是大利也非大利也許悔過也許悔過則

何以言叛也以地正國也以地正國則何以言叛其入無君命也史記孔子聞趙簡子不請晉君而執邯鄲

午保晉陽故書春秋曰趙鞅以晉陽畔

國語下邑之役董安于多趙簡子賞之辭固賞之對曰

方臣之少也進秉筆贊為名命稱於前世義於諸侯而

主弗志及臣之壯也耆其股肱以從司馬苛慝不產及

臣之長也端委鞶帶以隨宰人民無二心今臣一旦為狂疾而曰必賞女是以狂疾賞也不如亡趨而出乃釋之

左傳

十四年

梁嬰父惡董安于謂知文子曰不殺安于使

終為政於趙氏趙氏必得晉國盍以其先發難也討於趙氏文子使告於趙孟孟曰范中行氏雖信為亂安于則發之是安于與謀亂也晉國有命始禍者死二子既伏其罪矣敢以告趙孟孟患之安于曰我死而晉國寧趙氏

定將焉用生人誰不死吾死莫矣乃縊而死趙氏尸諸市而告於知氏曰主命戮罪人安于既伏其罪矣敢以告知伯從趙孟盟而後趙氏定祀安于於廟 晉人圍朝歌公會齊侯衛侯于脾上梁之間謀救范中行氏析成鮒小王桃甲率狄師以襲晉戰于絳中不克而還士鮒奔周小王桃甲入于朝歌秋齊侯宋公會于洮范氏故也冬十二月晉人敗范中行氏之師于潞獲籍秦高彊又敗鄭師及范氏之師于百泉

哀公元年

夏四月齊侯

衛侯救邯鄲圍五鹿 齊侯衛侯會于乾侯救范氏也

師及齊師衛孔圉鮮虞人伐晉取棘蒲冬十月晉趙鞅

伐朝歌

二年

秋八月齊人輸范氏粟鄭子姚子般送之

士吉射逆之趙鞅禦之遇于戚陽虎曰吾車少以兵車
之旆與罕駟兵車先陳罕駟自後隨而從之彼見吾貌
必有懼心於是乎會之必大敗之從之卜戰龜焦樂丁
曰詩曰爰始爰謀爰契我龜謀協以故兆詢可也簡子
誓曰范氏中行氏反易天明斬艾百姓欲擅晉國而滅

其君寡君恃鄭而保焉今鄭為不道棄君助臣二三子
順天明從君命經德義除詬恥在此行也克敵者上大
夫受縣下大夫受郡士田十萬庶人工商遂人臣隸圉
免志父無罪君實圖之若其有罪絞縊以戮桐棺三寸
不設屬辟素車樸馬無入於兆下卿之罰也甲戌將戰
郵無恤御簡子衛大子為右登鐵上望見鄭師衆大子
懼自投于車下子良授大子綏而乘之曰婦人也簡子
巡列曰畢萬匹夫也七戰皆獲有馬百乘死於牖下羣

子勉之死不在寇繁羽御趙羅宋勇為右羅無勇糜之
吏詰之御對曰疔作而伏衛大子禱曰曾孫蒯贖敢昭
告皇祖文王烈祖康叔文祖襄公鄭勝亂從晉午在難
不能治亂使鞅討之蒯贖不敢自供備持矛馬敢告無
絕筋無折骨無面傷以集大事無作三祖羞大命不敢
請佩玉不敢愛鄭人擊簡子中肩斃於車中獲其螽旗
大子救之以戈鄭師北獲溫大夫趙羅大子復伐之鄭
師大敗獲齊粟千車趙孟喜曰可矣傅叟曰雖克鄭猶

有知在憂未艾也初周人與范氏田公孫危稅馬趙氏
得而獻之吏請殺之趙孟曰為其主也何罪止而與之
田及鐵之戰以徒五百人宵攻鄭師取蠶旗於子姚之
幕下獻曰請報主德追鄭師姚般公孫林殿而射前列
多死趙孟曰國無小既戰簡子曰吾伏弢嘔血鼓音不
衰今日我上也大子曰吾救主于車退敵於下我右之
上也郵良曰我兩鞞將絕吾能止之我御之上也駕而

乘材兩鞞皆絕

國語鐵之戰趙簡子曰鄭人擊我吾伏
弢略血鼓音不衰今日之事莫我若也

衛莊公為右曰吾九上九下擊人盡殪今日之事莫我加也邾無正御曰吾兩鞞將絕吾能止之今日之事我上之次也駕而乘材兩鞞皆絕衛莊公禱曰曾孫蒯瞶以諄趙鞅之故敢昭告於皇祖文王烈祖康叔文祖襄公昭考靈公夷請無筋無骨無面傷無敗

用無隕懼死不敢請簡子曰志父寄也

三年冬十月

晉趙鞅圍朝歌師于其南荀寅伐其郛使其徒自北門入已犯師而出癸丑奔邯鄲十一月趙鞅殺士臯夷惡范氏也

四年

秋七月齊陳乞弦施衛甯跪救范氏庚午

圍五鹿九月趙鞅圍邯鄲冬十一月邯鄲降荀寅奔鮮

虞趙稷奔臨十二月弦施逆之遂墮臨國夏伐晉取邢

任欒郤逆時陰人孟壺口會鮮虞納荀寅于柏人 五
年春晉圍柏人荀寅士吉射奔齊

史記晉定公二十一年簡子拔邯鄲中行文子奔柏人
簡子又圍柏人中行文子范昭子遂奔齊趙竟有邯鄲
柏人范中行餘邑入於晉趙名晉卿實專晉權奉邑侷
於諸侯

新序中行寅將亡乃召其太祝而欲加罪焉曰子為我
祝犧牲不肥澤邪且齋戒不敬邪使吾國亡何也祝簡

對曰昔者吾先君中行穆子皮車十乘不憂其薄也憂德義之不足也今主君有革車百乘不憂德義之薄也唯患車不足也夫舟車飾則賦斂厚賦斂厚則民怨謗詛矣且君苟以為祝有益於國乎則詛亦將為損世亡矣一人祝之一國詛之一祝不勝萬詛國亡不亦宜乎

祝其何罪中行子乃慚

○晏子語同意

左傳初范氏之臣王生惡張柳朔言諸昭子使為柏人昭子曰夫非而讎乎對曰私讎不及公好不廢過惡不

去善義之經也臣敢違之及范氏出張柳朔謂其子爾從主勉之我將止死王生授我矣吾不可以僭之遂死

于柏人

呂氏春秋范氏之亡也百姓有得鐘者欲負而走則鐘大不可負以椎毀之鐘況然有音恐人

聞之而奪已也遽掩其耳惡人聞之可也惡已自聞之悖矣

夏趙鞅伐衛范氏之故

也遂圍中牟

韓非子晉中行文子出亡過於縣邑從者曰此嗇夫公之故人公奚不休舍且待後車文子曰吾嘗好音此人遺我鳴琴吾好佩此人遺我玉環是振我過者也以求

容於我者吾恐其以我求容於人也乃去之果收文子

從車二乘而獻之其君矣

說苑中行文子出亡至邊從者曰為此嗇夫者君人也胡

不休焉且待後車者文子曰異日吾好音此子遺吾琴吾好佩又遺吾玉是不非吾過者也自容於我者也吾恐其以我求容也遂不入後車入門文子問嗇夫之所在執而殺之仲尼聞之曰中行文子背道失義以亡其國然後得之猶活其身道不可遺也若此

家語子路問於孔子曰賢君治國所先者何孔子曰在於尊賢而賤不肖子路曰由聞晉中行氏尊賢而賤不肖矣其亡何也孔子曰中行氏尊賢而不能用賤不肖

而不能去賢者知其不用而怨之不肖者知其必已賤而讎之怨讎并存於國鄰敵構兵於郊中行氏雖欲無亡豈可得乎

國語趙簡子歎曰吾願得范中行之良臣史黯侍曰將焉用之簡子曰良臣人之所願也又何問焉對曰臣以為不良故也夫事君者諫過而賞善薦可而替不獻能而進賢擇才而薦之朝夕誦善敗而納之道之以文行之以順勤之以力致之以死聽則進不則退今范中行

氏之臣不能匡相其君使至於難君出在外又不能定而棄之則何良之為若弗棄則主焉得之夫二子之良將勤營其君使復立於外死而後止何日以來若來乃非良臣也簡子曰善吾言實過矣 趙簡子歎曰雀入於海為蛤雉入於淮為蜃黿鼉魚鼈莫不能化唯人不能哀夫竇犖侍曰臣聞之君子哀無人不哀無賄哀無德不哀無寵哀名之不令不哀年之不登夫中行范氏不恤庶難而欲擅晉國今其子孫將耕於齊宗廟之犧

為畎畝之勤人之化也何日之有

已上范氏中行氏之亡

史記趙簡子有臣曰周舍好直諫周舍死簡子每聽朝常不說大夫請臯簡子曰大夫無臯吾聞千羊之皮不如一狐之腋諸大夫朝徒聞唯唯不聞周舍之鄂鄂是以憂也簡子由此能附趙邑而懷晉人

韓詩外傳趙簡子有臣曰周舍立於門下三日三夜簡子使問之曰子欲見寡人何事周舍對曰願為諤諤之臣墨筆操牘從君之過而日有記也月有成也歲有効

也簡子居則與之居出則與之出居無幾何而周舍死
簡子如喪子後與諸大夫飲於洪波之臺酒酣簡子涕
泣諸大夫皆出走曰臣有罪而不自知簡子曰大夫皆
無罪昔者吾有周舍有言曰千羊之皮不若一狐之腋
衆人諾諾不若一士之諤諤昔者商紂默默而亡武王
諤諤而昌今自周舍之死吾未嘗聞吾過也吾亡無日
矣是以寡人泣也

說苑趙簡子游於河而樂之歎曰安得賢士而興處焉

舟人古乘跪而對曰夫珠玉無足去此數千里而所以能來者人好之也今士有足而不來者此是吾君不好之乎趙簡子曰吾門左右客千人朝食不足暮收市征暮食不足朝收市征吾尚可謂不好士乎舟人古乘對曰鴻鵠高飛遠翔其所恃者六翮也背上之毛腹下之毳無尺寸之數去之滿把飛不能為之益卑益之滿把飛不能為之益高不知門下左右客千人者有六翮之用乎將盡毛毳也

○新序韓詩外傳俱作晉平公事

趙簡子與欒激遊

將沈於河曰吾嘗好聲色矣而樂激致之吾嘗好宮室
臺榭矣而樂激為之吾嘗好良馬善御矣而樂激求之
今吾好士六年矣而樂激未嘗進一人是進吾過而黜
吾善也

國語趙簡子曰魯孟獻子有鬪臣五人我無一何也叔
向曰子不欲也若欲之胖也待交擇可也 趙簡子問
於壯馳茲曰東方之士孰為瘡壯馳茲拜曰敢賀簡子
曰未應吾問何賀對曰臣聞之國家之將興也君子自

以為不足其亡也。若有餘，今主任晉國之政而問及小人，又求賢人，吾是以賀。少室周為趙簡子右，聞牛談

有力，請與之戲，弗勝，致右馬。簡子許之，使少室周為宰。

曰：知賢而讓，可以訓矣。

韓非子少室周者古之貞廉潔慤者也為趙襄主力士與中牟

徐子角力不若也。入言之襄主以自代也。襄主曰：子之處人之所欲也。何為言徐子以自代？曰：臣以力事君者也。今徐子力多，臣臣不以自代，恐他人言之而為罪也。一曰：少室周為襄主驂乘，至晉陽，有力士牛子耕與角力而不勝。周言於主曰：主之所以使臣驂乘者，以臣多力也。今有多力於臣者，願進之。○此前事之舛。

說苑楊因見趙簡主曰：臣居鄉三逐，事君五去，聞君好

士故走來見簡主聞之絕食而歎跽而行左右進諫曰
居鄉三逐是不容衆也事君五去是不忠上也今君有
士見過八矣簡主曰子不知也夫美女者醜婦之仇也
盛德之士亂世所疏也正直之行邪枉所憎也遂出見
之因授以為相而國大治由是觀之遠近之人不可以

不察也

韓詩外傳魏文侯之時子質仕而獲罪馬去而
北游謂簡主曰從今以後而不復樹德於人矣

簡主曰何以也質曰吾所樹堂上之士半吾所樹朝廷
之大夫半吾所樹邊境之人亦半今堂上之士恐我以
法邊境之人劫我以兵是以不樹德於人也簡主曰噫
子之言過矣夫春樹桃李夏得陰其下秋得食其實春

樹蒺藜夏不可採其葉秋得其刺焉由此觀之在所樹也今子所樹非其人也故君子先擇而後種也詩曰無將大車惟塵冥冥○與陽虎語同必有一誤魏文侯不與趙簡子同時恐我以法下宜有關文

公叔

文子問於史叟曰武子勝事趙簡子久矣其寵不解奚也史叟曰武子勝博聞多能而位賤君親而近之致敏以遜貌而疏之則恭而無怨色入與謀國家出不見其寵君賜之祿知足而辭故能久也 趙簡子問於成搏曰吾聞夫羊殖者賢大夫也是行奚然對曰臣搏不知也簡子曰吾聞之子與友親子而不知何也搏曰其為

人也數變其十五年也廉以不匿其過其二十也仁以喜義其三十也為晉中軍尉勇以喜仁其年五十也為邊城將遠者復親今臣不見五年矣恐其變是以不敢

知簡子曰果賢大夫也每變益上矣

○家語作晉平公問祁奚曰羊舌大

夫何如按羊舌氏當趙簡子時久滅矣家語近是

新序趙簡子上羊腸之坂羣臣皆偏袒推車而虎會獨擔戟行歌不推車簡子曰寡人上坂羣臣皆推車會獨擔戟行歌不推車是會為人臣侮其主為人臣侮其主

其罪何若虎會對曰為人臣而侮其主者死而又死簡
子曰何為死而又死虎會曰身死妻子又死若是謂死
而又死君既已聞為人臣而侮其主者之罪矣君亦聞
為人君而侮其臣者乎簡子曰為人君而侮其臣者何
若虎會對曰為人君而侮其臣者智者不為謀辯者不
為使勇者不為鬪智者不為謀則社稷危辯者不為使
則使不通勇者不為鬪則邊境侵簡子曰善乃罷羣臣
不推車為士大夫置酒與羣臣飲以虎會為上客

○說苑晉

文侯隨會

事語同

國語趙簡子田於螻史黯聞之以犬待於門簡子見之
曰何為曰有所得犬欲試之茲囿簡子曰何為不告對
曰君行臣不從不順主將適螻而麓不聞臣敢煩當日
簡子乃還

莊子趙簡子出田鄭龍為右有一野人簡子曰龍下射
彼使無驚吾馬三命鄭龍鄭龍不對簡子怒鄭龍曰昔
吾先君伐衛克曹退為踐土之盟不戮一人吾今一朝

田而曰必為我殺人是虎狼食人故將救之簡子愀焉
曰不愛其身以活人者可無從乎還車輟田曰人之田

也得獸今吾田也得士

○逸篇今本無亦
作梁君公孫龍事

王孫子趙簡子獵於晉山之陽撫膺而歎董安于曰敢
問何歎簡子曰吾有食穀之馬數千多力之士數百欲

以獵獸也吾恐鄰國養賢以獵吾也

說苑趙簡子舉兵
而攻齊令軍中有

敢諫者罪至死被甲之士名曰公盧望見簡子大笑簡
子曰子何笑對曰臣有夙笑簡子曰有以解之則可無
以解之則死對曰當桑之時臣鄰家夫與妻俱之田見
桑中女因往追之不能得還反其妻怒而去之臣笑其

曠也簡子曰今吾伐國失國
是吾曠也於是罷師而歸

韓非子董闕于為趙上地守行石邑山中澗深峭如牆
深百仞因問其旁鄉左右曰人嘗有入此者乎對曰無
有曰嬰兒癡聾狂悖之人嘗有入此者乎對曰無有牛
馬犬彘嘗有入此者乎對曰無有董闕于喟然太息曰
吾能治矣使吾法之無赦猶入澗之必死也則人莫之
敢犯也何為不治之

說苑趙簡子從晉陽之邯鄲中路而止引車吏進問君

何為止簡主曰董安于在後吏曰此三軍之事也君奈何以一人留三軍也簡主曰諾驅之百步又止吏將進諫董安于適至簡主曰秦道之與晉國交者吾忘令人塞之董安于曰此安于之所為後也簡主曰官之寶璧吾忘令人載之對曰此安于之所為後也簡主曰行人燭過年長矣言未嘗不為晉國法也吾行忘令人辭且聘焉對曰此安于之所為後也簡主可謂內省外知人矣哉故身供國安 董安于治晉陽問政於蹇老蹇老

曰曰忠曰信曰敢董安子曰安忠乎曰忠於主曰安信乎曰信於令曰安敢乎曰敢於不善人董安子曰此三者足矣

韓非子董安子之心
緩故佩弦以自急

呂氏春秋趙簡子有兩白騾而甚愛之陽城胥渠處廣門之官夜款門而謁曰主君之臣胥渠有疾醫教之曰得白騾之肝病則止不得則死謁者入通董安子御於側愠曰譖胥渠也期吾君騾請即刑焉簡子曰夫殺人以活畜不亦不仁乎殺畜以活人不亦仁乎於是召庖人

殺白騾取肝以與陽城胥渠處無幾何趙興兵而攻翟

廣門之官左七百人右七百人皆先登而獲甲首

列子邯鄲

之民以正月之旦獻鳩於簡子簡子大說厚賞之客問其故簡子曰正月放生示有恩也客曰民知君之欲放之故競而捕之死者衆矣君如欲生之不若禁民勿捕捕而放恩過不相補矣簡子曰然

說苑趙簡子春築臺於邯鄲天雨而不息謂左右曰可

無趨種乎尹鐸對曰公事急厝種而懸之臺夫雖欲趨

種不能得也簡子惕然乃釋臺罷役曰我以臺為急不

如民之急也民以不為臺故知吾之愛也

韓非子趙簡主出稅者吏請輕重簡主曰勿輕勿重重則利入於上若輕則利歸於民吏無私利而正矣 薄疑謂簡主曰君之國中飽簡主欣然而喜曰何如馬對曰府庫空虛於上百姓貧餓於下然而姦吏富矣

說苑趙簡子乘弊車馱馬衣殺羊裘其宰進諫曰車新則安馬肥則往來疾狐白之裘溫且輕簡子曰吾非不知也吾聞之君子服善則益恭細人服善則益倨我以自備恐有細人之心也傳曰周公位尊愈卑勝敵愈懼

家富愈儉故周氏八百餘年此之謂也

韓非子簡主謂左右車席泰美夫冠雖賤頭必戴之屨雖貴足必履之今車席如此泰美吾將何屨以履之夫美下而耗上妨義之本也

呂氏春秋趙簡子曰厥也愛我鐸也不愛我厥之諫我也必於無人之所鐸之諫我也喜質我於人中必使我醜尹鐸對曰厥也愛君之醜也而不愛君之過也鐸也愛君之過也而不愛君之醜也臣嘗聞相人於師教顏

而土色者忍醜不質君於人中恐君不變也

說苑趙簡子有臣尹

綽救厥簡子曰厥愛我諫我必不於衆人中綽也不愛我諫我必於衆人中尹綽曰厥也愛君之醜而不愛君之過也臣愛君之過而不愛君之醜孔子曰君子哉尹綽面訾不譽也○尹綽即尹鐸之訛說苑或謂趙簡子曰君何不更乎簡子曰諾左右曰君未有過何更君曰吾謂是諾未必有過也吾將求以來諫者也今我却之是却諫者諫者必止我過無日矣

國語趙簡子使尹鐸為晉陽請曰以為繭絲乎抑為保
鄣乎簡子曰保鄣哉尹鐸損其戶數簡子誠襄子曰晉
國有難而無以尹鐸為少無以晉陽為遠必以為歸

趙簡子使尹鐸為晉陽曰必墮其壘培吾將往焉若見壘培是見寅與吉射也尹鐸往而增之簡子如晉陽見壘怒曰必殺鐸也而後入大夫辭之不可曰是昭余讎也郵無正進曰昔先主文子少釁於難從姬氏於公宮有孝德以出在公族有恭德以升在位有武德以羞為正卿有溫德以成其名譽失趙氏之典刑而去其師保基於其身以克復其所及景子長於公宮未及教訓而嗣立矣亦能纂修其身以受先業無謗於國順德以學

子擇言以教子擇師保以相子今吾子嗣位有文之典
刑有景之教訓重之以師保加之以父兄子皆疏之以
及此難夫尹鐸曰思樂而喜思難而懼人之道也委土
可以為師保吾何為不增是以修之庶曰可以鑑而鳩
趙宗乎若罰之是罰善也罰善必賞惡臣何望矣簡子
說曰微子吾幾不為人矣以免難之賞賞尹鐸初伯樂
與尹鐸有怨以其賞如伯樂氏曰子免吾死敢不歸祿
辭曰吾為主圖非為子也怨若怨焉

韓非子解狐薦其
辭於簡主以為相

其讎以為且幸釋己也乃因往拜謝狐乃引弓送而射之曰夫薦汝公也以汝能當之也夫讎汝吾私怨也不以私怨汝之故擁汝於吾君故私怨不入公門一曰解狐舉邢伯柳為上黨守柳往謝之曰子釋罪敢不再拜曰舉子公也怨子私也子往矣怨子如初也○此祁奚事而舛訛姓名亦相亂

呂氏春秋趙簡子晝居喟然太息曰異哉吾欲伐衛十年矣而衛不伐侍者曰以趙之大而伐衛之細君若不欲則可也君若欲之請令伐之簡子曰不如而言也衛有士十人於吾所吾乃且伐之十人者其言不義也而我伐之是我為不義也故簡子之時衛以十人者按趙

之兵歿簡子之身衛可謂知用人矣遊十士而國家得安簡子可謂好從諫矣聽十士而無侵小奪弱之名趙簡子將襲衛使史默往睹之期以一月六月而後返趙簡子曰何其久也史默曰謀利而得害猶弗察也今蘧伯玉為相史鮒佐焉孔子為客子貢使令於君前甚聽易曰渙其羣元吉渙者賢也羣者衆也元者吉之始也渙其羣元吉者其佐多賢也簡子按兵而不動

說苑趙簡子使人以明白之乘六先以一璧為遺於衛

衛叔文子曰見不意可以生故此小之所以事大也今我未以往而簡子先以來必有故於是斬林除圍聚斂蓄積而後遣使者簡子曰吾舉也為不可知也今既已

知之矣乃輟圖衛也

○戰國策智伯欲伐衛同

韓非子趙簡子圍衛之郭郭犀楯犀櫓立於矢石之所及鼓之而士不起簡子投袍曰烏乎吾之士數弊也行人燭過免胄而對曰臣聞之亦有君之不能耳士無弊者昔者吾先君獻公并國十七服國三十八戰十有二

勝是民之用也獻公沒惠公即位淫行暴亂身好玉女
秦人來侵去絳十七里亦是人之用也惠公沒文公授
之圍衛取鄆城濮之戰五敗荆人取尊名於天下亦此
人之用也亦有君不能耳士無弊也簡子乃去楯櫓立
矢石之所及鼓之而乘士之戰大勝簡子曰與吾得革
車千乘不如聞行人燭過之一言也

說苑趙簡子攻陶有二人先登死於城上簡子欲得之
陶君不與承盆疽謂陶君曰簡子將掘君之墓以與君

之百姓市曰踰邑梯城者將舍之不者將掘其墓朽者揚其灰未朽者辜其尸陶君懼請効二人之尸以為和

趙簡子問於翟封荼曰吾聞翟雨穀三日信乎曰信又聞雨血三日信乎曰信又聞馬生牛牛生馬信乎曰信簡子曰大哉妖亦足以亡國矣對曰雨穀三日蚩風之所飄也雨血三日鷲鳥擊於上也馬生牛牛生馬雜牧也此非翟之妖也簡子曰然則翟之妖奚也對曰其國數散其君幼弱其諸卿貸其大夫比黨以求祿爵其

百官肆斷而無告其政令不竟而數化其士巧貪而有

怨此其妖也

列女傳女娟者河津之女初趙簡子南擊楚與津吏期簡子至津吏醉臥不能渡簡

子欲殺之娟曰妾父聞主君來渡不測之水恐風波之起水神動駭故禱祠九江三淮之神供具備禮御釐受福不勝玉祝杯酌餘涇醉至於此君欲殺之妾願以鄙軀易父之死簡子曰非女子之罪也娟曰主君欲因其醉而殺之妾恐其身之不知痛而心不知罪也是殺不辜也願醒而殺之使其知罪簡子曰善遂釋不誅將渡用楫者少一人娟攘卷操楫而請曰妾願備父持楫簡子曰不穀將行選士大夫齋戒沐浴義不與婦人同舟而渡也娟對曰妾聞昔者湯伐夏左驂牝驪右驂牝靡而遂放桀武王伐殷左驂牝驪右驂牝驪而遂克紂主君不欲渡則已與妾同舟又何傷乎簡子說遂與渡中流為簡子發河激之歌其辭曰升彼阿兮面觀清水揚

波兮杳冥冥，禱求福兮醉不醒。誅將加兮妾心驚，罰既釋兮瀆乃清。妾持檝兮操其維，蛟龍助兮主將歸。呼來摧兮行勿疑，簡子大說曰：昔者不穀夢娶妻，豈比女乎？將使人祝，祓以為夫人。媼乃辭曰：婦人之禮，非媒不嫁。嚴親在內，不敢聞命。簡子歸，乃納幣於父母而立，以為夫人。已上趙簡子之賢。

史記姑布子卿見簡子，簡子徧召諸子相之。子卿曰：無為將軍者。簡子曰：趙氏其滅乎？子卿曰：吾嘗見一子於路，殆君之子也。簡子召子毋卹，毋卹至，則子卿起曰：此真將軍矣。簡子曰：此其母賤，翟婢也。奚道貴哉？子卿曰：天所授，雖賤必貴。自是之後，簡子盡召諸子與語。毋卹

最賢簡子乃告諸子曰吾藏寶符於常山上先得者賞
諸子馳之常山上求無所得毋卹還曰已得符矣簡子

曰奏之母卹曰從常山上臨代代可取也簡子於是知

毋卹果賢乃廢太子伯魯而以毋卹為太子

韓詩外傳
趙簡子大

子名伯魯小子名無恤簡子自為一書牘曰節用聽聰
敬賢勿慢使能勿賤親自表之與二子使誦之居三年
簡子坐清臺之上問二書所在伯魯亡其表令誦不能
得無恤出其書於袖令誦習焉乃出伯魯而立無恤是
為襄子○通鑑
本比今本無

呂氏春秋趙簡子病召太子而告之曰我死已葬服衰

而上夏屋之山以望太子敬諾簡子死已葬服衰召大臣而告之曰願登夏屋以望大臣皆諫曰登夏屋以望是遊也服衰以遊不可襄子曰此先君之命也寡人弗敢廢羣臣敬諾襄子上於夏屋以望代俗其樂甚美於是襄子曰先君必以此教之也及歸慮所以取代乃先善之代君好色請以其弟姊妻之代君許諾弟姊已往所以善代者乃萬故馬郡宜馬代君以善馬奉襄子襄子謁於代君而請觴之馬郡盡先令舞者置兵其羽中

數百人先具大金斗代君至酒酣反斗而擊之一成腦
塗地舞者操兵以鬪盡殺其從者因以代君之車迎其
妻其妻道聞之狀磨笄以自刺故趙氏至今有刺笄之
證與反斗之號

史記襄子姊前為代王夫人簡子既葬未除服北登夏
屋請代王使厨人操銅料以食代王及從者行斟陰令
宰人各以料擊殺代王及從官遂興兵平代地其姊聞
之泣而號天摩笄自殺代人憐之所死地名之為摩笄

之山

水經注趙襄子既害代王迎姊姊代夫人夫人曰以弟慢夫非仁也以夫怨弟非義也摩笄自刺而

死使者自殺民憐之而立神屋於山側因名之為磨笄之山

韓氏外傳昔者趙簡子薨而未葬而中牟畔之葬五日襄子興師而次之圍未匝而城自壞者十丈襄子擊金而退之軍吏諫曰君誅中牟之罪而城自壞者是天助之也君曷為而退之襄子曰吾聞之於叔向曰君子不乘人於利不厄人於險使其城然後攻之中牟聞其義而請降曰善哉襄子之謂也詩曰王猷允塞徐方既來

新序佛肸以中牟叛置鼎於庭致士大夫曰與我者受
邑不吾與者烹大夫皆從之至於田卑田卑中牟之邑
人也曰義死不避斧鉞之罪義窮不受軒冕之服無義
而生不仁而富不如烹褰裳將就鼎佛肸脫屣而生之
趙氏聞其叛也攻而取之聞田卑不肯與也求而賞之
田卑曰不可也一人舉而萬夫俛首智者不為也賞一
人以慙萬夫義者不取也我受賞使中牟之士懷恥不
義辭賞從處曰以行臨人不道吾去矣遂南之楚

說苑
佛肸

用中牟之縣畔設祿邑炊鼎曰與我者受邑不與我者其烹中牟之士皆與之城北餘子田基獨後至曰基聞之義者軒冕在前非義弗乘斧鉞於後義死不避遂祛衣將入鼎佛肸播而止趙簡子屠中牟得而取之論有功者用田基為始田基曰吾聞廉士不恥人如此而受中牟之功則中牟之士終身慙矣襁負其母南徙於楚楚王高其義待以司馬○田卑田基一事也簡子當作襄子二書俱出中壘之手而所載駁異如此

列女傳佛肸以中牟叛趙之法以城叛者身死家收佛肸之母將論自言我死不當襄子見而問之曰母不能教子故使至於反母何為不當死也母曰吁以主君殺妾為有說也乃以母無教邪妾之職盡久矣此乃在於

主君妾聞子少而慢者母之罪也長而不能使者父之罪也今妾之子少而不慢長又能使妾何負哉妾能為君長子君自擇以為臣妾之子與在論中此君之臣非妾之子君有暴臣妾無暴子是以言妾無罪也襄子曰善遂釋之

國語趙襄子使新穉穆子伐翟勝左人中人遽人來告襄子將食尋飯有恐色侍者曰狗之事大矣而主色不怡何也襄子曰吾聞之德不純而福祿並至謂之幸夫

幸非福非德不當雖不為幸吾是以懼

列子趙襄子使新穉穉子

攻翟勝之取左人中人使遽人來謁之襄子方食而有憂色左右曰一朝而兩城下此人之所喜也今君有憂色何也襄子曰夫江河之大也不過三日飄風暴雨不終朝日中不須臾今趙氏之德行無所施於積一朝而兩城下亡其及我哉孔子聞之曰趙氏其昌乎夫憂者所以為昌也喜者所以為亡也勝非其難者也持之其難者也賢主以此持勝故其福及後世齊楚吳越皆常勝矣然卒取亡焉不達乎持勝也唯有道之主為能持勝

韓非子王登為中牟令上言於襄主曰中牟有士曰中章胥己者其身甚修其學甚博君何不舉之主曰子見

之我將為中大夫相室諫曰中大夫晉重列也今無功而受非晉臣之意君其耳而未之目邪襄主曰我取登既耳而目之矣登之所取又耳而目之是耳目人絕無已也王登一日而見二中大夫予之田宅中牟之人棄

其田耘賣宅圃而隨文學者邑之半

○呂覽作任登膳胥已

新序趙襄子飲酒五日五夜不廢酒謂侍者曰我誠邦士也夫飲酒五日五夜矣而殊不病優莫曰君勉之不及紂二日耳紂七日七夜今君五日襄子懼謂優莫曰

然則吾亡乎優莫曰不亡襄子曰不及紂二日耳不亡何待優莫曰桀紂之亡也遇湯武今天下盡桀也而君紂也桀紂並世焉能相亡然亦殆矣

○可入滑稽列傳

韓非子趙襄主學御於王子期俄而與子期逐三易馬而三後襄主曰子之教我御術未盡也對曰術已盡用之則過也凡御之所貴馬體安于車人心調于馬而後可以進速致遠今君後則欲逮臣先則恐逮於臣夫誘道爭遠非先則後也而先後心皆在於臣尚何以調於

馬比君之所以後也

列子趙襄子率徒十萬狩於山中藉芴燔林扇赫百里
有一人從石壁中出隨煙燼上下衆謂鬼物火過徐行
而出若無所經涉者襄子怪而留之徐而察之形色七
竅人也氣息音聲人也問奚道而處石奚道而入火其
人曰奚物而謂石奚物而謂火襄子曰而向之所出者
石也而向之所涉者火也其人曰不知也魏文侯聞之
問子夏曰彼何人哉子夏曰以商所聞夫子之言和者

大同於物物無得傷闕者遊金石蹈水火皆可也文侯曰吾子奚不為之子夏曰剗心去智商未之能雖然試語之有暇矣文侯曰夫子奚不為之子夏曰夫子能之而不能不為者也文侯大說

已上趙襄子之立

國語知宣子將以瑤為後知果曰不如宵也宣子曰宵也很對曰宵之很在面瑤之很在心心很敗國面很不害瑤之賢於人者五其不逮者一美鬢長大則賢射御足力則賢伎藝畢給則賢巧文辯惠則賢彊毅果敢則

賢如是而甚不仁以其五賢陵人而以不仁行之其誰

能待之若果立瑤也知宗必滅弗聽知果別族於太史

為輔氏及知氏之亡唯輔果在

世本逝遨生莊子首首
生武子瑩瑩生莊子朔

朔生悼子盈盈生文子櫟
櫟生宣子申申生智伯瑤

左傳

哀公二十三年

夏六月晉荀瑤伐齊高無平帥師御之知

伯視齊師馬駭遂驅之曰齊人知余旗其謂余畏而反

也及壘而還將戰長武子請卜知伯曰君告於天子而

卜之以守龜於宗祧吉矣吾又何卜焉且齊人取我英

丘君命瑤非敢耀武也治英丘也以辭伐罪足矣何必

卜壬辰戰于犁丘齊師敗績知伯親禽顏庚

紀年晉出公四年晉

澮絕于梁丹水三日絕不流

二十四年夏四月晉侯將伐齊使來

乞師曰昔臧丈仲以楚師伐齊取穀宣叔以晉師伐齊

取汶陽寡君欲徼福於周公願乞靈於臧氏臧石帥師

會之取廩丘軍吏令繕將進萊章曰君卑政暴往歲克

敵今又勝都天奉多矣又焉能進是僇言也役將班矣

晉師乃還餽臧石牛大史謝之曰以寡君之在行牢禮

不度敢展謝之

二十七年

晉荀瑶帥師伐鄭次于桐丘鄭

駟弘請救于齊齊師將興陳成子屬孤子三日朝設乘車兩馬繫五邑馬召顏涿聚之子晉曰隰之役而父死馬以國之多難未女恤也今君命女以是邑也服車而朝毋廢前勞乃救鄭及留舒違穀七里穀人不知及濮雨不涉子思曰大國在敝邑之宇下是以告急今師不行恐無及也成子衣製杖戈立於坂上馬不出者助之鞭之知伯聞之乃還曰我卜伐鄭不卜敵齊使謂成子

曰大夫陳子陳之自出陳之不祀鄭之罪也故寡君使
瑤察陳衷焉謂大夫其恤陳乎若利本之顛瑤何有焉
成子怒曰多陵人者皆不在知伯其能久乎中行文子
告陳子曰有自晉師告寅者將為輕車千乘以厭齊師
之門則可盡也成子曰寡君命恒曰無及寡無畏衆雖
過千乘敢辟之乎將以子之命告寡君文子曰吾乃今
知所以亡君子之謀也始衷終皆舉之而後入焉今我
三不知而入之不亦難乎

說苑晉智伯伐鄭齊田恒救
之有登蓋必身立焉車徒有

不進者必令助之壘合而後敢處井窳成而後敢食智
伯曰吾聞田恒新得國而愛其民內同其財外同其勤
勞治軍若此其得衆也不
不可待也乃去之耳

悼之四年晉荀瑶帥師圍鄭

未至鄭駟弘曰知伯悞而好勝早下之則可行也乃先
保南里以待之知伯入南里門于桔秩之門鄭人俘鄗
魁壘賂之以知政閉其口而死將門知伯謂趙孟入之

對曰主在此知伯曰惡而無勇何以為子對曰以能忍
恥庶無害趙宗乎知伯不悞趙襄子由是甚知伯遂喪

之知伯貪而悞故韓魏反而喪之

史記晉出公十一年
知伯伐鄭趙簡子疾

使太子毋卹將而圍鄭知伯醉以酒灌擊毋卹毋卹羣臣請死之毋卹曰君所以置毋卹為能忍詢然亦愠知伯知伯歸因謂簡子使廢毋卹簡子不聽毋卹由此怨知伯○晉出公十一年即魯悼之四年也按左傳哀公二十年趙襄子稱先臣志父是簡子之卒已久何得於此簡子猶在史記誤甚淮南子趙簡子以襄子為後董闕子曰無恤賤今以為後何也簡子曰是為人也能為社稷忍羞異日知伯與襄子飲而批襄子之首大夫請殺之襄子曰先君之立我也曰能為社稷忍羞豈曰能刺人哉

國語知襄子為室美士茁夕焉知伯曰室美夫對曰美則美矣抑臣亦有懼也知伯曰何懼對曰臣以秉筆事君志有之曰高山峻原不生草木松栢之地其土不肥

今土木勝臣懼其不安人也室成三年而知氏亡

紀年
晉出

公十二年晉河絕于扈
十三年晉荀瑶城南梁

呂氏春秋中山之國有夙繇者智伯欲攻之而無道也
為鑄大鐘方車二軌以遺之夙繇之君將斬岸堙谿以
迎鐘赤章蔓枝諫曰詩云唯則定國我胡則以得是於
智伯夫智伯之為人也貪而無信必欲攻我而無道也
故為大鐘方車二軌以遺君君因斬岸堙谿以迎鐘師
必隨之弗聽有頃諫之君曰大國為懼而子逆之不祥

子釋之赤章蔓枝曰為人臣不忠貞罪也忠貞不用遠
身可也斷轂而行至衛七日而夙繇亡

○韓非子作仇由紀年晉出

公十八年河水赤三日荀
瑶伐中山取窮魚之丘

戰國策智伯欲伐衛遺衛君野馬四百璧一衛君大說
羣臣皆賀南文子有憂色衛君曰大國大懼而子有憂
色何文子曰無功之賞無力之禮不可不察也野馬四
百璧一此小國之禮而大國致之君其圖之衛君以其
言告邊境智伯果起兵而襲衛至境而反曰衛有賢人

先知吾謀也

○說苑趙簡子事同

智伯欲襲衛乃佯亡其太子

使奔衛南文子曰太子顏為君子也甚愛而有寵非有大罪而亡必有故使人迎之於境曰車過五乘慎勿納也智伯聞之乃止

說苑吳赤市使於智氏假道於衛甯文子具紵絺三百製將以送之大夫豹曰吳雖大國也不攘交假之道則亦敬矣又何禮焉甯文子不聽遂致之吳赤市至於智氏既得事將歸吳智伯命造舟為梁吳赤市曰吾聞之

天子濟於水造舟為梁諸侯維舟為梁大夫方舟方舟
臣之職也且敬太甚必有故使人視之視則用兵在後
矣將以襲衛吳赤市曰衛假吾道而厚贈我我見難而
不告是與為謀也稱疾而留使人告衛衛人警戒智伯

聞之乃止

○是時吳滅久矣未詳所云

國語還自衛三卿宴於藍臺知襄子戲韓康子而侮段
規知伯國聞之諫曰主不備難必至矣曰難將由我我
不為難誰敢興之對曰異於是夫卻氏有車轅之難趙

有孟姬之讒樂有叔祁之愆范中行有函冶之難皆主
之所知也夏書有之曰一人三失怨豈在明不見是圖
周書有之曰怨不在大亦不在小夫君子能勤小物故
無大患今主一宴而恥人之君相又弗備曰不敢興難
無乃不可乎夫誰不可喜而誰不可懼蝸蟻逢蠆皆能
害人況君相乎弗聽自是五年乃有晉陽之難段規反
首難而殺知伯於師遂滅知氏

史記知伯與趙韓魏盡分其范中行故地晉出公怒告

齊魯欲以伐四卿四卿恐遂共攻出公出公奔齊道死
知伯乃立昭公曾孫驕是為晉懿公知伯益驕請地韓
魏韓魏與之請地趙趙不與以其圍鄭之辱知伯怒遂
率韓魏攻趙

國語晉陽之圍張談曰先主為重器也為國家之難盍
姑無愛寶於諸侯乎襄子曰吾無使也張談曰地也可
襄子曰吾不幸有疾不夷於先子不德而賄夫地也求
飲吾欲是養吾疾而干吾祿也吾不與皆斃襄子出曰

吾何走乎從者曰長子近且城厚完襄子曰罷民力以完之又斃以守之其誰與我從者曰邯鄲之倉庫實襄子曰浚民之膏澤以實之又因而殺之其誰與我其晉

陽乎先主之所屬也尹鐸之所寬也民必蘇矣乃走晉

陽晉師圍而灌之沈竈產毒民無畔意

史記趙襄子懼乃奔保晉陽原

過從後至於王澤見三人自帶以上可見自帶以下不可見與原過竹二節莫通曰為我以是遺趙毋卹原過既至以告襄子襄子齊三日親自剖竹有朱書曰趙毋卹余霍泰山山陽侯大使也三月丙戌余將使女反滅知氏女亦立我百邑余將賜女林胡之地至於後世且有仇王赤黑龍面而鳥喙鬚麋髭頰大膺大脗修下而

馮左袞果乘奄有河宗至于休溷諸貉南
伐晉別北滅黑姑襄子再拜受三神之令

戰國策智伯索地於魏桓子魏桓子弗予任章曰何故
弗予桓子曰無故索地故弗予任章曰無故索地鄰國
必恐重欲無厭天下必懼君子之地智伯必驕驕而輕
敵鄰國懼而相親以相親之兵待輕敵之國智氏之命
不長矣周書曰將欲敗之必姑輔之將欲取之必姑與
之君不如與之以驕智伯君何釋以天下圖智氏而獨
以吾國為智氏資乎君曰善乃與之萬家之邑一智伯

大說因索蔡臯狼於趙趙弗與因圍晉陽韓魏反於外
趙氏應之於內智氏遂亡 智伯帥趙韓魏而伐范中
行氏滅之休數年使人請地於韓韓康子欲勿與段規
諫曰不可夫智伯之為人也好利而鷙復來請地不與
必加兵於韓矣君其與之彼狃又將請地於他國他國
不聽必鄉之以兵然則韓可以免於患難而待事之變
康子曰善使使者致萬家之邑一於智伯智伯說又使
人請地於魏魏桓子欲勿與趙段諫曰彼請地於韓韓

與之請地於魏魏弗與則是魏內自強而外怒智伯也
然則其錯兵於魏必矣不如與之桓子曰諾因使人致
萬家之邑一於智伯智伯說又使人之趙請蔡臯狼之
地趙襄子弗與智伯陰結韓魏將以伐趙趙襄子召張
孟談而告之曰夫智伯之為人陽親而陰疎三使韓魏
而寡人弗與焉其移兵寡人必矣今吾安居而可張孟
談曰夫董闕安于簡子之才臣也世治晉陽而君澤循
之其餘政教猶存君其定居晉陽君曰諾乃使延陵君

將車騎先之晉陽君因從之行至城郭案府庫視倉廩
召張孟談曰吾城郭之完府庫足用倉廩實矣無矢奈
何張孟談曰臣聞董子之治晉陽也公宮之垣皆以荻
蒿苫楚檜之其高至丈餘君發而用之於是發而試之
其堅則筍籬之勁不能過也君曰矢足矣吾銅少若何
張孟談曰臣聞董子之治晉陽也公宮之室皆以鍊銅
為柱質請發而用之則有餘銅矣君曰善號令已定備
守已具三國之兵乘晉陽城遂戰三月不能拔因舒軍

而圍之決晉水而灌之圍晉陽三年城中巢居而處懸
釜而炊財食將盡士卒病羸襄子謂張孟談曰糧食匱
財力盡士大夫病吾不能守矣欲以城下何如張孟談
曰臣聞之亡不能存危不能安則無為貴知士也君釋
此計勿復言也臣請見韓魏之君襄子曰諾張孟談於
是陰見韓魏之君曰臣聞唇亡則齒寒今智伯帥二國
之君伐趙趙將亡矣亡則二君為之次矣二君曰我知
其然夫智伯之為人麤中而少親我謀未遂而知則其

禍必至為之奈何張孟談曰謀出二君之口入臣之耳人莫之知也二君即與張孟談陰約三軍與之期日夜遣入晉陽張孟談以報襄子襄子再拜之張孟談因朝智伯而出遇智過轅門之外智過入見智伯曰二主殆將有變君曰何如對曰臣遇張孟談於轅門之外其志矜其行高智伯曰不然吾與二主約謹矣破趙三分其地寡人所親之必不欺也子釋之勿出於口智過出見二主人說智伯曰二主色動而意變必背君不如令殺

之智伯曰兵著晉陽三年矣旦暮當拔而饗其利乃有他心不可子慎勿復言智過曰不殺則遂親之智伯曰親之奈何智過曰魏桓子之謀臣曰趙葭韓康子之謀臣曰段規是皆能移其君之計君其與二君約破趙則封二子者各萬家之縣一如是則二主之心可不變而君得其所欲矣智伯曰破趙而三分其地又封二子者各萬家之縣一則吾所得者少不可智過見君之不用也言之不聽出更其姓為輔氏遂去不見張孟談聞之

入見襄子曰臣遇智過於轅門之外其視有疑臣之心
入見智伯出更其姓今暮不擊必後之矣襄子曰諾使
張孟談見韓魏之君日夜期殺守堤之吏而決水灌智
伯軍智伯軍救水而亂韓魏翼而擊之襄子將卒犯其
前大敗智伯軍而禽智伯智伯身死國亡地分為天下
笑此貪欲無厭也夫不聽智過亦所以亡也智氏盡滅
惟輔氏存焉

○張孟談國語作張談智過
國語作智果君澤尹鐸之訛

智伯從韓

魏兵以攻趙圍晉陽而水之城之不沈者三板郟疵謂

智伯曰韓魏之君必反矣智伯曰何以知之郝疵曰以其人事知之矣從韓魏之君而攻趙趙亡難必及韓魏矣今約勝趙而三分其地今城不沒者三板曰竈生鼃人馬相食城降有日而韓魏之君無喜色而有憂色是非反如何也明日智伯以告韓魏之君曰郝疵言君之且反也韓魏之君曰夫勝趙而三分其地城今且將拔矣夫二家雖愚不棄美利於前背信盟之約而為危難不可成之事其勢可見也是疵為趙計矣使君疑二主

之心而解於攻趙也今君聽讒臣之言而離二主之交
為君惜之趨而出郟疵謂智伯曰君又何以疵言告韓
魏之君焉智伯曰子安知之對曰韓魏之君視疵端而
趨疾郟疵知其言之不聽請使於齊智伯遣之韓魏之
君果反矣

墨子昔者晉有六將軍而智伯莫為強焉計其土地之
博人徒之衆欲以抗諸侯以為英名攻戰之速故差論
其爪牙之士皆列舟車之衆以攻中行氏而有之以其

謀為既已足矣又攻茲范氏而大敗之并三家以為一家而不止又圍趙襄子於晉陽及若此則韓魏亦相從而謀曰古者有語唇亡則齒寒趙氏朝亡我夕從之趙氏夕亡我朝從之詩曰魚水不務陸將何及乎是以二主之君一心戮力辟門除道奉甲興士韓魏自外趙氏自內擊智伯大敗之是故子墨子言曰古者有語曰君子不鏡於水而鏡於人鏡於水見面之容鏡於人則知吉於凶今以攻戰為利則蓋嘗鑒之於智伯之事乎此

其為不吉而凶既可得而知矣

淮南子張武為知伯謀曰晉六將軍中行文子

最弱而上下離心可伐以廣地於是伐范中行氏而滅之矣又教知伯求地於韓魏趙韓魏裂地而授之趙氏不與乃率韓魏而伐趙圍晉陽三年襄子鑽龜筮占兆以視利害謂張孟談曰吾恐不能守矣欲以城下何國之可下孟談乃潛行而出三國陰謀同計以擊知氏遂滅之

史記三國攻晉陽歲餘引汾水灌其城城不浸者三版城中懸釜而炊易子而食羣臣皆有外心禮益慢唯高共不敢失禮襄子懼乃夜使相張孟同私於韓魏韓魏與合謀以三月丙戌三國反滅知氏共分其地於是襄

子行賞高共為上張孟同曰晉陽之難唯共無功襄子曰方晉陽急羣臣皆懈唯共不敢失人臣禮是以先之

○呂氏春秋作高赦韓非子說苑俱作高赫

韓非子襄子圍於晉陽中出圍賞有功者五人高赫為賞首張孟談曰晉陽之事赫無大功今為賞首何也襄子曰晉陽之事寡人國危社稷殆矣吾羣臣無有不驕侮之意者惟赫子不失君臣之禮是以先之仲尼聞之曰善賞哉襄子賞一人而天下為人臣者莫敢失禮矣

或曰仲尼不知善賞矣夫善賞罰者百官不敢侵職羣臣不敢失禮上設其法而下無姦詐之心如此則可謂善賞罰矣使襄子於晉陽也令不行禁不止是襄子無國晉陽無君也尚誰與守哉今襄子於晉陽也知氏灌之穴竈生鼃而民無反心是君臣親也襄子有君臣親之澤操令行禁止之法而猶有驕侮之臣是襄子失罰也為人臣者乘事而有功則賞今赫僅不驕侮而襄子賞之是失賞也明主賞不加於無功罰不加於無罪今

襄子不誅驕侮之臣而賞無功之赫安在襄子之善賞

也故曰仲尼不知善賞

○知伯之滅也去孔子卒二十七年矣何韓非果於非聖而不

稽其時邪

智伯兼范中行而攻趙不已韓魏反之軍敗晉

陽身死高良之東遂卒被分漆其首以為溲器故曰禍

莫大於不知足

說苑智伯尉人亡矣選而知之韓魏反而不知

淮南子智伯圍襄子於晉陽襄子疏隊而擊之大敗知

伯破其首以為飲器

○說苑同

呂氏春秋張孟談踰城潛行與魏桓韓康期而擊智伯

斷其頭以為觴遂定三家

史記韓魏殺知伯埋於鑿壺之下○後漢書注引今本無

古文瑣語知伯為趙襄子所敗將出走夢火見於西方乃出奔秦又夢見於南方遂奔楚也○諸書皆言智

伯見殺何得出奔秦楚史記於是趙北有代南并知氏疆於韓魏遂祠三神於百邑使原過主霍泰山祠祀

戰國策三晉已破智氏將分其地段規謂韓王曰分地

必取成臯韓王曰成臯石溜之地也寡人無所用之段

規曰不然臣聞百里之厚而動千里之權者地利也萬

人之衆而破三軍者不意也王用臣言則韓必取鄭矣

王曰善果取成臯至韓之取鄭也果從成臯始大張

孟談既固趙宗廟封疆發五霸乃稱簡之塗以告襄子
曰昔者前國地君之御有之曰五霸之所以致天下者
約主勢能制臣無令臣能制主故貴為列侯者不令在
相位自將軍以上不為近大夫今臣之名顯而身尊權
重而衆服臣願損功名去權勢以離衆襄子恨然曰何
哉吾聞輔主者名顯功大者身尊任國者權重信忠在
已而衆服焉此先聖之所以集國家安社稷乎子何為
然張孟談對曰君之所言成功之美也臣之所謂持國

之道也臣觀成事聞往古天下之美同臣主之權均之
能美未之有也前事之不忘後事之師君若弗圖則臣
力不足愴然有決色襄子去之臥三日使人謂之曰晉
陽之政臣下不使者何如對曰死僂張孟談曰左司馬
見使於國家安社稷不避其死以成其忠君其行之君
曰子從事乃許之張孟談便厚以便名納地釋事以去
權尊而耕於負親之丘故曰賢人之行明主之政也耕
三年韓魏齊楚負親以謀趙襄子往見張孟談而告之

曰昔者智氏之地趙氏分則多十城復來而今諸侯謀我為之奈何張孟談曰君其負劍而御臣以之國舍臣於廟授吏大夫臣試計之君曰諾張孟談乃行其妻之楚長子之韓次子之魏少子之齊四國疑而謀敗 晉畢陽之孫豫讓始事范中行氏而不說去而就智伯智伯寵之及三晉分智氏趙襄子最怨智伯而將其頭以為飲器豫讓遁逃山中曰嗟乎士為知己者死女為說己者容吾其報智伯之讎矣乃變姓名為刑人入宮塗

廁欲以刺襄子襄子如廁心動執問塗者則豫讓也刃其扞曰欲為智伯報讎左右欲殺之趙襄子曰彼義士也吾謹避之耳且智伯已死無後而其臣至為報讎此天下之賢人也卒釋之豫讓又漆身為厲滅鬚去眉自刑以變其容為乞人而往乞其妻不識曰狀貌不似吾夫其音何類吾夫之甚也又吞炭為啞變其音其友謂之曰子之道甚難而無功謂子有志則然矣謂子智則否以子之才而善事襄子襄子必近幸子子之得近而

行所欲此甚易而功必成豫讓乃笑而應之曰是為先知報後知為故君賊新君大亂君臣之義者無此矣吾所謂為此者以明君臣之義非從易也且夫委質而事人而求弑之是懷二心以事君也吾所為難亦將以愧天下後世人臣懷二心者居頃之襄子當出豫讓伏以過橋下襄子至橋而馬驚襄子曰此必豫讓也使人問之果豫讓於是趙襄子面數豫讓曰子不嘗事范中行氏乎智伯滅范中行氏而子不為報讎反委質事智伯

智伯已死子獨何為報讎之深也豫讓曰臣事范中行氏范中行氏以衆人遇臣臣故衆人報之智伯以國士遇臣臣故國士報之襄子乃喟然歎泣曰嗟乎豫子之為智伯名既成矣寡人舍子亦已足矣子自為計寡人不舍子使兵環之豫讓曰臣聞明主不掩人之義忠臣不愛死以成名君前已寬舍臣天下莫不稱君之賢今日之事臣故伏誅然願請君之衣而擊之雖死不恨非所望也敢布腹心於是襄子義之乃使使者持衣與豫

讓豫讓拔劍三躍呼天擊之曰而可以報智伯矣遂伏

劍而死死之日趙國之士聞之皆為涕泣

○史記索隱引戰國策曰

衣盡血出襄子迴車車輪未周而亡今本亦無此語也

新書豫讓事中之君智伯滅中行氏豫讓徙事智伯及趙襄子破智伯豫讓劑面而變容吞炭而為啞乞食妻所而妻弗識乃伏刺襄子五起而弗中襄子患之食不甘味一夕五易臥見不全身人謂豫讓曰子不死中行而反事其讎何無可恥之甚也今必碎身糜軀以為

智伯何其與前異也。豫讓曰：我事中之君與帷而衣之與關而枕之，夫衆人畜我，我故衆人事之。及智伯分吾以衣服，餽吾以鼎實，舉被而為禮，是以國士遇我，我故國士報之。

說苑：智伯與趙襄子戰於晉陽下而死。智伯之臣豫讓者，怒以其精氣能使襄主動心，乃漆身變形，吞炭更聲。襄主將出，豫讓偽為死人，處於梁下。駟馬驚，不進。襄子動心，使使視梁下，得豫讓。襄主重其義，不殺也。又盜為

抵罪被刑人赭衣入繕宮襄主動心則曰必豫讓也襄
主執而問之曰子始事中行君智伯殺中行君子不能
死還反事之今吾殺智伯乃漆身為厲吞炭為啞欲殺
寡人何與先行異也豫讓曰中行君衆人畜臣臣亦衆
人事之智伯朝士待臣臣亦朝士為之用襄子曰非義
也子壯士也乃自置車庫中水漿毋入口者三日以禮
豫讓讓自知遂自殺也

呂氏春秋趙襄子遊於園中至
於梁馬却不肯進青荈為參乘

襄子曰進視梁下類有人青荈進視梁下豫讓却寢佯
為死人叱青荈曰去長者吾且有事青荈曰少而與子

友子且為大事而我言之見失相與友之道子將賊吾君而我不言之是失為人臣之道如我者惟死為可適乃退而自殺

新序知伯囂之時有士曰長兒子魚絕知伯而去之三年將東之越而道聞知伯囂之見殺也謂御曰還車反吾將死之御曰夫子絕知伯而去之三年矣今反死之是絕屬無別也長兒子魚曰不然吾聞仁者無餘愛忠臣無餘祿吾聞知伯之死而動吾心餘祿之加於我者至今尚存吾將往依之反而死

○囂瑶聲相近疑即一事
史記秦厲共公二

十五年晉大夫知開率其邑人來奔○二事見年表正義曰開知伯知伯寬率其邑人來奔○
瑤子也已上
知氏之亡

晉三卿韓魏趙氏起於獻公之世卒分晉國獻之十
六年趙夙賜耿畢萬賜魏韓萬者或曰桓叔之子或
曰周之同姓其封韓亦在獻公時晉國之興晉國之
所自亡乎文公之出也趙魏狐胥實用從亡鄭叔詹
曰有三士足以上人宋公孫固曰晉公子父事狐偃
師事趙衰長事賈佗叔向曰有士五人介子推曰五

蛇從之故反國之後輔成霸業濟濟乎其有人矣晉
卿之見於春秋者十有一族狐氏唐叔之裔也韓欒
卻皆公族也趙魏胥先范知中行皆異姓也文公之
世先軫將中軍襄公以其子且居代之其後先穀召
狄景公殺之先氏以亡狐突以姬氏故為晉大夫二
子毛偃俱事文公至襄公使射姑將中軍陽處父易
之以趙盾故射姑殺處父而奔狄狐氏以亡胥臣從
文公與其子甲世佐下軍其後胥克以疾廢胥童以

道君為亂殺胥氏以亡成公時卻缺為政景公時卻
克為政逮厲公之世錡也犛也至也並居卿位樂書
譖而殺之卻氏以亡欒枝之後至景公時欒書為政
厲公時鄆陵勝楚反而弑君再傳至盈范匄逐之盈
入為亂欒氏以亡士為之後景公時士會為政平公
時士匄為政定公時士鞅為政其子吉射與中行氏
作亂范氏以亡荀氏自林父將中行因以為氏其後
至悼公時荀偃為政傳吳至寅與范氏為亂中行氏

以亡知氏亦荀氏也荀首食采於知因別氏焉其子
瑩輔悼公以為政三駕伐鄭晉用復霸瑩之力也再
傳至躒與韓魏趙逐范中行氏其子瑤貪而復求地
三卿三卿滅之知氏以亡方晉國之盛也其權在上
及其衰也權在下矣叔向曰欒郤胥原狐續慶伯降
在卑隸公室之卑何日之有吳公子札聘晉說趙文
子韓宣子魏獻子曰晉國其萃於三族乎故晉之滅
其卿族也公室自戕其枝葉晉大夫之轉相滅亡也

諸族遞為驅除以成三晉之勢也夫趙氏以晉國勲臣聯姻公室自衰及盾兩世執政乃嬰齊淫亂姬氏為讒原屏之禍幾至覆絕雖史稱追論靈公之弑然當時不能治也後之人何罪晉於是為失刑矣子文無後何以勸善賴韓厥進言趙氏廢而復興顧景公不明往往專殺先穀先軫之孫也同括成季之子也縱無十世之宥奚至殄宗天道不爽大厲為崇其言雖不經亦可為好殺者戒云欒郤自傾危趙氏以來

權勢日張而郤氏復三子並卿彊偏尤甚屬當厲公之暗君侈臣犯多猜忌之釁叔适季伐尤聚怨之藪加以疆場多虞君臣警惕猶堪紓死乃鄆陵一戰猝勝大敵六間之謀復出温季是速之禍也厲公多嬖而又信讒樂書懷忌而復善譖胥童挾怨陽魚煽惑三郤之死曾不煩一甲兵馬大臣人人自危嬖人無厭復從而構之匠麗難作公亦惟禍然後知晉國之患果不在外而在內也殺三郤者厲公不可謂獨出

於厲公殺胥童弑君者書偃不可謂獨出於書偃敵殺大夫于國而胥郤之罪均敵弑君于國而書偃之首惡著矣勝敵非福反為厲階此單子所以識禍亂之先幾范文子抑鬱而祈死乎至夫士鞅之論欒氏也以為書之德其報在厲厲之汰其報在盈及盈之身而書之所施已沒厲之怨實章此據人事則然耳若以天道則欒氏之亡端自書取之何也書黨莊姬以譖原屏比楚蔑以害三郤而又親弑其君倖免大

戮猶保其子天之於人也蓋遲久而後示罰焉厲也
侈汰盈也聚慝此所謂積惡餘殃用絕厥世且韓范
荀趙之族羣起而共疾之沾沾小惠得人奚能救敗
乃晉君無道至合天下之諸侯錮一亡臣是驅之為
惡也昔巫臣去楚子反請以重幣錮之楚子曰彼若
能利國家雖重幣晉將可乎若無益於晉晉將棄之
何勞錮焉奈何晉君計不出此而商任沙隨紛紛會
盟況欒盈亦非有犯上行私之罪徒以范氏私怨諸

大夫誹激以成其惡而平公曾不能悟焉嗚呼滅胥者郤而郤復殺於欒讒郤者欒而欒復逐於范謀人者人亦謀之自是晉之卿族轉相殘滅以至分裂晉國而後止晉定公十有六年秋趙鞅入晉陽以叛冬荀寅士吉射入朝歌以叛趙鞅歸于晉春秋詳而書之是時晉霸已衰諸侯離叛然諸侯之叛實自大夫之叛始君孤立于上羣臣交爭于下分權樹黨勢不相容鞅也而殺邯鄲午寅也吉射也為午而伐鞅躒

也不信也曼多也為鞅而伐范中行氏趙據晉陽范
中行據朝歌專殺專伐其罪均也晉國有令始禍者
死而鞅則先之且晉陽保障夙稱彊備朝歌僅足以
自守未必深為晉患也然而寅與吉射不反鞅獨善
歸者趙氏之黨盛矣韓魏知皆朋比為耦於是以擅
兵逐卿之罪舉而蔽之二氏鞅且借甲晉陽倡為除
惡君側之義故得叛而歸歸而盟晉人咸無異辭焉
於是晉國之政歸於趙氏鞅專為構怨今年伐朝歌

明年伐邯鄲復戰鐵以讎鄭討襄弘以徇天子治餘黨以侵鮮虞凡皆為范中行氏之故非為晉國謀也愛憎自鞅出君無與知以視荀士之亂政又加變矣夫晉自三郤之亡七族並盛知罃范荀偃韓起欒黶范魴魏絳趙武襄八年傳稱悼公之八卿也其後欒氏復亡韓起趙成荀吳魏舒范鞅知盈昭五年傳稱平公之六卿也至於定公而范荀亡晉止四卿矣至於哀公而知伯滅晉又止三卿矣故平昭以前慮

晉卿之多頃定以後慮晉卿之少卻氏之偪也欒氏
之汰也范中行氏之貪也知氏兼之史稱知伯瑤請
地於韓魏各致萬家之邑請地於趙趙弗與知伯怒
而圍之韓魏陰與趙合反而喪之左氏謂趙襄子甚
知伯知伯不悛此其所以亡也知氏滅而三晉之勢
成王晉分而七國之形立讀春秋之終而知戰國之
始傳曰竊鉤者誅竊國者為諸侯欒卻范荀知氏竊
鉤者也韓魏趙竊國者也

繹史卷八十七下